



Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
GRADONAČELNIK

Odluka

**o proceduri, uslovima i standardima imenovanja članova Skupštine Javnog preduzeća za upravljanje, zaštitu i održavanje objekata Grada Sarajeva i obavljanje komunalnih i drugih djelatnosti od javnog interesa Grada Sarajeva „SARAJEVO“ društvo sa ograničenom odgovornošću
(Prijedlog)**

Predlagač: Gradonačelnica

Obrađivač: Stručna služba gradonačelnice

Sarajevo, juni 2021. godine

Adresa: Hamdije Kreševljakovića 3
71000 Sarajevo, BiH
Tel: +387 33 407 443
Fax: +387 33 208 341
Email: grad@sarajevo.ba
Web: www.sarajevo.ba



Na osnovu člana 26. Statuta Grada Sarajeva („Službene novine Kantona Sarajevo“, broj 34/08 – prečišćeni tekst) i Zakona o ministarskim, vladinim i drugim imenovanjima Federacije Bosne i Hercegovine („Službene novine Kantona Sarajevo“, br. 34/03 i 65/13), Gradsko vijeće Grada Sarajeva, na __. sjednici održanoj dana __.06.2021. godine, donijelo je:

(Prijedlog)

Odluka

o proceduri, uslovima i standardima imenovanja članova Skupštine Javnog preduzeća za upravljanje, zaštitu i održavanje objekata Grada Sarajeva i obavljanje komunalnih i drugih djelatnosti od javnog interesa Grada Sarajeva „SARAJEVO“ društvo sa ograničenom odgovornošću

Član 1.

Ovom Odlukom se u skladu sa Zakonom o ministarskim, vladinim i drugim imenovanjima Federacije Bosne i Hercegovine definiše procedura, uslovi i standardi za imenovanje članova skupštine Javnog preduzeća za upravljanje, zaštitu i održavanje objekata Grada Sarajeva i obavljanje komunalnih i drugih djelatnosti od javnog interesa Grada Sarajeva „SARAJEVO“ društvo sa ograničenom odgovornošću (u daljnjem tekstu: Skupština preduzeća).

Član 2.

U skladu sa zakonima, vršioce dužnosti članova Skupštine preduzeća imenuje Gradsko vijeće Grada Sarajeva na prijedlog gradonačelnice Grada Sarajeva na period koji ne može biti duži od 3 mjeseca.

Član 3.

(1) Svi kandidati za imenovanje za člana Skupštine preduzeća dužni su da ispunjavaju sljedeće zakonske uslove:

- a) da su stariji od 18 godina;
- b) da nisu otpušteni iz državne službe kao rezultat disciplinske mjere na bilo kojem nivou u Bosni i Hercegovini (bilo na nivou države ili entiteta) u periodu od tri godine prije dana objavljivanja upražnjene pozicije;
- c) da se na njih ne odnosi član IX. 1. Ustava Bosne i Hercegovine.

(2) Osim općih uslova propisanih zakonom, članovi Skupštine moraju ispunjavati i sljedeće uslove:

- a) da nisu izabrani dužnosnici ili imenovani dužnosnici u izvršnoj vlasti na svim nivoima vlasti u Bosni i Hercegovini;
- b) visoka stručna sprema i najmanje 2 godine radnog staža nakon sticanja zvanja;
- c) da nisu direktori javnih ustanova ili preduzeća.

Član 4.

(1) Gradonačelnica Grada Sarajeva objavljuje javni oglas za imenovanje članova Skupštine preduzeća.

(2) Oglas se objavljuje u „Službenim novinama Federacije Bosne i Hercegovine“ i najmanje jednom dnevnom listu velikog tiraža s ciljem da bude dostupan najširoj javnosti.

(3) Oglas za upražnjeno mjesto člana Skupštine preduzeća sadrži:

- a) opis upražnjene pozicije člana Skupštine preduzeća;
- b) opće i ostale uslove koje kandidati moraju ispunjavati;
- c) preciziranje dokumenata kojima se dokazuje ispunjavanje uslova;
- d) spisak potrebnih dokumenata, rok i mjesto za podnošenje prijava;
- e) iznos nadoknade za obavljanje dužnosti;
- f) dužina trajanja mandata.

(4) Krajnji rok za podnošenje prijava ne smije biti kraći od 14 dana od dana objave oglasa o upražnjenoj poziciji u traženim novinama.

(5) U oglasu o upražnjenoj poziciji mora se jasno naglasiti da oni podnosioci prijava sa kojima se ne stupa u kontakt u određenom roku, a nakon roka za podnošenje prijava, neće biti uzeti u razmatranje u daljnjem procesu imenovanja te da se neće dostavljati pisane odbijenice kandidatima koji ne ispunjavaju uslove.

Član 5.

(1) Gradska uprava Grada Sarajeva imenuje Komisiju za izbor članova Skupštine preduzeća koja je zadužena za pregledanje prijava na javni oglas.

(2) Komisiju iz stava (1) imenuje gradonačelnica svojim rješenjem iz reda državnih službenika i namještenika.

(3) Komisija za izbor se sastoji od 5 članova i prilikom imenovanja članova komisije, gradonačelnica će voditi računa o tome da članovi komisije za izbor, po mogućnosti, budu lica koja su pokazala da poznaju odredbe ovog zakona o ministarskim, vladinim i drugim imenovanjima

Član 6.

(1) Komisija za izbor pregledat će sve prijave koje stignu u propisanom roku

(2) Komisija će sastaviti listu sa izborom najboljih kandidata koji ispunjavaju kriterije za imenovanje za člana Skupštine preduzeća.

(3) Svi kandidati liste s užim izborom pozivaju se na intervju. Prilikom pozivanja kandidata na intervju, svaki kandidat koji je ušao u užu izbor mora dobiti obrazac u kojem će iznijeti bilo koje pitanje koje bi moglo dovesti do sukoba interesa u slučaju da dođe do njegovog imenovanja.

(4) Komisija za izbor će prije intervjua zahtijevati da kandidati koji su ušli u uži izbor daju podatke o odgovarajućem broju ranijih neposrednih rukovodilaca od kojih se mogu dobiti preporuke i informacije o kandidatima.

(5) Sve odluke, uključujući i one koje sadrže odbijenice, moraju u potpunosti biti dokumentovane i moraju se čuvati u Gradskoj upravi.

Član 7.

(1) Komisija za izbor poziva sve kandidate koji su ušli u uži izbor na intervju.

(2) Intervju se mora obaviti na način kojim će se obezbijediti poštovanje principa iz člana 3. Zakona o ministarskim, vladinim i drugim imenovanjima Federacije Bosne i Hercegovine.

(3) Sve odluke koje potiču sa intervjua, uključujući i one sa odbijenicom, u potpunosti se dokumentuju.

(4) U toku intervjua, komisija za izbor osigurat će sljedeće:

a) da su svi kandidati u potpunosti upoznati sa standardom ličnog integriteta koji se traže za lica imenovana na javnu poziciju;

b) da su pitanja o sukobu interesa objašnjena i razmotrena detaljno sa svim kandidatima;

c) da su svi kandidati u potpunosti informisani o pravu javnosti putem mehanizama koji su detaljno navedeni u ovom zakonu, da može uložiti prigovor protiv imenovanja koje se razmatra.

Član 8.

(1) Nakon intervjua i na osnovu u potpunosti dokumentovanih odluka svakog člana komisije, komisija za izbor će putem pisane preporuke predložiti rang-listu sa najboljim kandidatima gradonačelnici Grada Sarajeva na daljnje razmatranje. Pisana preporuka sadrži sve relevantne informacije koje izborna komisija ima o kandidatima i njene preporuke.

(2) Smatra se da je kandidat koji je prvi na rang-listi i kojeg je preporučila većina članova komisije za izbor, najuspješnije prošao otvorenu konkurenciju.

(3) Nakon što komisija za izbor dostavi prijedlog rang-liste kandidata gradonačelnici Grada Sarajeva, ona će predložiti Gradskom vijeću Grada Sarajeva prijedlog Odluke imenovanje člana/članova Skupštine preduzeća.

Član 9.

Ukoliko Gradsko vijeće Grada Sarajeva ne usvoji godišnji Izvještaj o radu Javnog preduzeća za upravljanje, zaštitu i održavanje objekata Grada Sarajeva i obavljanje komunalnih i drugih djelatnosti od javnog interesa Grada Sarajeva „SARAJEVO“ društvo sa ograničenom odgovornošću, gradonačelnica Grada Sarajeva može razriješiti člana ili članove Skupštine preduzeća i predložiti imenovanje vršioca dužnosti člana ili članova Skupštine do imenovanja novih članova Skupštine preduzeća u skladu sa zakonom i ovom Odlukom.

Član 10.

Ova odluka stupa na snagu osam dana od dana objavljivanja u „Službenim novinama Kantona Sarajevo”.

PREDSJEDAVALJUĆI GRADSKOG VIJEĆA

Jasmin Ademović

Broj:

Datum:

OBRAZLOŽENJE

I PRAVNI OSNOV

Pravni osnov za donošenje ove Odluke sadržan je u članu 26. Statuta Grada Sarajeva („Službene novine Kantona Sarajevo“, broj 34/08 – prečišćeni tekst).

Također ovu oblast uređuje i Zakon o ministarskim, vladinim i drugim imenovanjima Federacije Bosne i Hercegovine („Službene novine Kantona Sarajevo“, br. 34/03 i 65/13)

II RAZLOZI ZA DONOŠENJE

Gradska uprava Grada Sarajeva i Gradsko vijeće Grada Sarajeva u proteklom periodu nisu vršili imenovanja u skladu sa federalnim zakonima te se ovom odlukom način izbora članova skupštine Javnog preduzeća za upravljanje, zaštitu i održavanje objekata Grada Sarajeva i obavljanje komunalnih i drugih djelatnosti od javnog interesa Grada Sarajeva „SARAJEVO“ društvo sa ograničenom odgovornošću, usklađuje sa federalnim zakonima.

III OBRAZLOŽENJE PRAVNIH RJEŠENJA

Članom 1. se definišu opće odredbe odluke.

Članom 2. se definiše način izbora vršioca dužnosti do 3 mjeseca u skladu sa federalnim zakonom.

Članom 3. se definišu opći zakonski i posebni uslovi za imenovanje člana Skupštine javnog preduzeća.

Članom 4. se propisuje sadržaj javnog oglasa za imenovanje članova Skupštine

Članom 5. se propisuje imenovanje Komisije za izbor i njene nadležnosti.

Članom 6. se propisuje utvrđivanje liste uspješnih kandidata.

Članom 7. se definiše način provođenja intervjua sa kandidatima.

Članom 8. se definiše dostavljanje rang-liste kandidata i upućivanje prijedloga Gradskom vijeću od strane gradonačelnice.

Članom 9. se daje mogućnost gradonačelnici da razriješi članove Skupštine ukoliko Gradsko vijeće Grada Sarajevo ne usvoji izvještaj o radu tog preduzeća.

IV POTREBNA FINANSIJSKA SREDSTVA

Za provođenje ove odluke nisu potrebna finansijska sredstva.